

## 開放文學 – 歷代筆記 – 夷堅乙志 卷第十三

劉子文 劉總、字子文、紹興初、為忠州臨江、今秩滿寓居鄰邑墊江縣、有子曰侍老、六歲矣、子文忽見其乳媪旁有小兒、長短與侍老相似、意其與外僕私通所生者、以咎其妻、妻李氏癡懦、不能治家、然知為妄也、應曰、無是事、子文怒、時已苦股痛、常策木瓜杖、即扶妻背使出、往白其母、母曰、兒誤聞之、安得有是言、子文嗟恚曰、吾母尚如此、復何望、歸舍以果誘侍老曰、爾乳母夜與何人寢、其兒為誰、侍老愕然不能對、子文遽前執其手、攫擊不置、左右急救之、猶敗面流血、遂呼媪逐去之、曰、汝來我家數年、兒亦長矣、乃以奸穢自敗、以吾兒故、不忍治汝、汝好去、媪泣拜出、子文目送之、笑語侍人曰、渠兒已相隨出門、丑跡俱露、而家人共蔽匿之、何也、眾知其將病、不旬時果被疾死、病中時自言我數與太守爭辯不得、汝非不知、何為相守不去、後其弟絳雲、子文為夔州士曹日、獄有一囚、在生死之間、郡守欲殺之、子文不強爭、囚竟死、則病中所見、疑其祟雲、子文、予外姑之兄也。

### 九華天仙

紹興九年、張淵道侍郎、家居無錫縣南禪寺、其女請大仙、忽書曰、九華天仙降、問為誰、曰、世人所謂巫山神女者是也、賦惜奴嬌大曲一篇、凡九闕、【其一曰】、瑤闕瓊宮、高枕巫山十二、曙瞿塘千載、灩灩雲濤沸、異景無窮、好閒吟滿酌金卮、憶前時楚襄王、曾來夢中相會、吾正鬢亂釵橫、斂霞衣雲縷、向前低揖、問我仙職、桃杏遍開、綠草萋萋鋪地、燕子來時、向巫山朝朝行雨暮行雲、有閒時、只恁畫堂高枕、【瑤台景第二】繞繞雲梯、上徹青霄霞外、與諸仙同飲鎮長春醉、虎嘯猿吟、碧桃香異風飄細、奇、想人間難識這般滋味、姮娥奏樂簫韶、有仙音異品、自然清脆、過住行雲不敢飛、空凝滯、好是波瀾澄湛、一溪香水、【蓬萊景第三】山染青螺、縹渺人間難陟、有珠珍光照、晝夜無休息、仙景無極、欲言時汝等何知、且修心、要觀游亦非大段難易、下俯浮生、尚自爭名逐利、豈不省來歲擾擾兵戈起、天慘雲愁、念時衰如何是、使我輩終日蓬宮下淚、【勸人第四】再啟諸公、百歲還如電急、高名顯位、瞬息爾泛水輕漚、霎那間難久立、畫燭當風裡、安能久之、速往茅峰割愛休名避世、等功成須有上真相引、指放死求生施良藥、功無比、千萬記此個奇方第一、【王母宮食蟠桃第五】方結實累累、翠枝交映、蟠桃顆顆、仙味真香美、遂命雙成持靈刀割來耳、服一粒令我延年萬歲、堪笑東方、便起私心盜餌、使宮中仙伴、遞互相尤帶、無柰雙成向王母高陳之、遂指方偷了蟠桃是你、【玉清宮第六】紫雲絳霧、高擁瑤砌、曉光中無限剖列、肅整天仙隊、又有殊音、欲舉聲還止、朝罷時亦有清香飄世、玉駕才興、高上真仙盡退、有瓊花如雪、散漫飛空裡、玉女金童、捧丹文傳仙誨、撫諸仙早起、勞卿過耳、【扶桑宮第七】光陰奇扶桑宮裡、日日常畫、風物鮮明、可愛無陰晦、大帝頻鑑於瑤池朱欄外乘鳳飛、教主開顏命醉、寶樂齊吹、盡是瓊姿天妓、每三杯須用聖母親來搯、異果名花幾千般、香盈袂、意欲歸、卻乘鸞車鳳翼、【太清宮第八】顯煥明霞、萬丈祥雲高布、望仙官衣帶、曳曳臨香砌、玉獸齊焚、滿高穹盤龍勢、大帝起玉女金童遍侍、奉飭宣言、甚荷諸仙厚意、復回奏、感恩頓首皆躬袂、奏畢還宮、尚依然雲霞密奇更異、非我君何聞耳、【歸第九】吾歸矣、仙宮久離、洞戶無人管之、專俟吾歸、欲要開金燧、千萬頻修己、言訖無忘之、哩囉哩、此去無由再至、事冗難言、爾輩須能自會、汝之、言還、便是如吾意、大抵方寸平平無憂耳、雖改易之愁何畏詞成文不加點、又大書曰、吾且歸、遂去、明日別有一人自稱歌曲仙、曰、昨夕巫山神女見招、雲、在君家作詞、慮有不協律處、令吾潤色之、及閱視、但改數字而已、其第三篇所云、來歲擾擾兵戈起、時虜人方歸河南、人以此說為不然、明年、淵道自祠官起提舉秦司茶馬、度淮而北、至鄭陽、虜兵大至、蒼黃奔歸、盡室幾不免、河南復陷、考詞中之句、神其知之矣、法慧燃日

紹興五年夏大旱、朝廷遍禱山川祠廟、不應、遣臨安守往上天竺迎靈感觀音、於法惠寺建道場、滿三七日、又弗應時、六月過半矣、苦行頭陀潘法慧者、默禱於佛、乞焚右目以施、即取鐵彈投諸火、煨令通紅、置眼中、然香其上、香燄才起、行雲滿空、大雨傾注、闔境沾足、法慧眼即枯、深中洞赤、望之可畏、然所願既諧、殊自喜也後三日、夢白衣女子來、欲借一隔珠、拒不許、二僧在傍曰、與伊不妨、伊自令六六送還、既覺、不曉所謂、至七月二十一日、又夢二僧來請赴六通齋、白衣女亦至、在前引導、法慧問何人、僧曰、我等施主也、慧曰、女人恐不識路、師何不相引同行、僧曰、他路自熟、稍前進、則山林蔚然、百果皆熟、紛紛而墜、慧就地拾果食之、覺心地清涼、非常日比、又俯首欲拾間、女子忽回面、擲一彈、正中所燃目、失聲大呼而寤、枯眶內已有物若鵝眼、瞻視如初、漸大復舊、數其再明之時、恰三十六日、始悟六六送還之兆、

### 蚌中觀音

溧水人俞集、宣和中、赴泰州興化尉、挈家舟行、淮上多蚌蛤、舟人日買以食、集見必輟買、放諸江、他日得一籃甚重、眾欲烹食、倍價償之、堅不可、遂置諸釜中、忽大聲從釜起、光燄相屬、舟人大恐、熟視之、一大蚌裂開、現觀世音像於殼間、傍有竹兩竿、挺挺如生、菩薩相好端嚴、冠衣瓔珞、及竹葉枝幹、皆細真珠綴成者、集令舟中人皆誦佛悔罪、而取其殼以歸、傳燈錄載唐文宗嗜蛤蜊、亦睹佛像之異、但此又有雙竹為奇耳、宋貺益謙說、

### 盱眙道人

紹興三十年、楊抑之抗為盱眙守、有道人不知所從來、能大言、談人禍福或中、楊敬之如神、館於郡治之東齋、每招寮屬與共飲、道人時時舉目旁視、類有所睹、春夜過半、楊之子恂、婦將就寢、恂出外喚人呼乳醫、過東齋、聞道人在室內與客語、及還、又見其送客出、隱隱有黑影自南去、固已怪之、忽前揖曰、尊公已出廳、吾將往謁、恂曰、方熟睡未起也、咄曰、燈燭羅陳、賓客滿坐、君何以戲我、恂止之不可、遂還舍、明日白其父、父猶謂其與異人相過、戒勿輕言、後半月、宿直者早起、齋門已開、而道人不見、急尋之、乃在齋北叢竹間、以帶自絞死矣、始知前所見、皆鬼祟也、蔣德誠天祐時為通判、親見之、

### 牛觸倡

桂林之北二十里曰甘棠鋪、紹興十六年、方務德滋為廣西漕、桂府官吏皆出迎候、營妓亦集於鋪前、散詣民家憩息、一黃犢逸出欄、群倡奔避、牛徑於眾中觸一人、以角抵其腹於壁、腸胃皆出即死、牛發狂掣走入山、裡正與士兵數十人、執弓弩槍杖逐之、凡兩日乃射死、倡之姓名曰甘美、自後風雨陰晦之夕、人皆聞其冤哭聲、曆數年方止、

### 嚴州乞兒

嚴州東門外有丐者、坐大樹下、身形垢污、便穢滿前、行人過之皆掩鼻、李次仲季獨疑為異人、具衣冠往拜、丐者大罵極口、次仲拱立不敢去、忽笑曰、吾有一詩贈君、即唱曰、緣木求魚世所希、誰知木杪有魚飛、乘流遇坎眾人事、才三句復云、你卻不次、仲懇求末句、又大罵、竟不成章、明年紹興甲子歲、嚴州大水、郡人連坊漂溺死者甚眾、而次仲家居最高、獨免其禍、始悟詩意及你卻不之語、次仲說、

### 食牛詩

秀州人盛肇、居青龍鎮超果寺、好食牛肉、與陳氏子友善、陳嘗遣僕來約、旦日會食、視其簡無有是言、獨於勻碧箋紙一幅內大書曰、萬物皆心化、唯牛最苦辛、君看橫死者、盡是食牛人、肇驚嗟久之、呼其僕已不見、且而詢諸陳氏、元未嘗遣也、肇懼、自此不食牛、趙綱立振甫說、

### 海島大竹

明州有道人、行乞於市、持大竹一節、徑三尺許、血痕洩其中、自云本山東商人、曾泛海遇風、漂墮島上、登岸縱目、望巨竹參天、翠色欲滴、歎訝其異、方徘徊賞玩、俄有皂衣兩人來、雲尋汝正急、乃在此耶、答曰、適從舟中來、尚不知此為何處、何為

覓我·皂衣不應·夾粹以前·滿路嶄峭·如棘針而甚大·刺足底絕痛·不可行·問其人曰·牛角也·益怪之·復前行·至一處·主者責曰·汝好食牛·當受苦報·始大恐·拜乞命·曰·請後不敢·主者曰·汝既悔過·今釋汝·可歸語世人·視此為戒·曰·有如何不信·以何物為驗·主者顧左右令截竹·使持歸便見·兩人攜大鋸·趨入林中·少頃而竹至·鮮血盈管·下流污衣·雲·方鋸解囚未了·聞呼即至·不暇滌鋸也·遂持竹回舟·既還家·即棄妻子·辭鄉里他適·而函跡丐中·趙振甫屢見之·

#### 嵩山三異

劉居中·京師人·少時隱於嵩山·居山顛最深處·曰控鶴庵·初與兩人同處·率一兩月·輒下山覓糧·登陟極艱苦·往往躋攀葛藟·窮日力乃至·兩人不堪其憂·皆捨去·獨劉居之自若·凡二十年·遭亂南來·紹興間嘗召入宮·賜衝靜處士·今廬於豫章之東湖·每為人言昔日事·雲嵩山峻極處·有平地可為田者百畝·別有小山岩岫之屬·常時雲雨·只在半山間·大蜥蜴數百·皆長三四尺·人以食就手飼之·拊摩其體膩如脂·一日·聚繞水盂邊·各就取水·才入口·即吐出·已圓結如彈丸·積之於側·俄頃間累累滿地·忽震雷一聲起·彈丸皆失去·明日山下人來·言昨正午雨雹大作·乃知蜥蜴所為者此也·又聞石壁間老人讀書·逼而聽之寂然·既退復爾·其後石壁摧·得異書甚多·陰陽方技修真黃白之學·無所不有·既下山·獨取其首尾全者數十篇·餘悉焚之·又嘗聞異香滿室·經日乃散·不知所從來也·劉生於元豐七年甲子歲·

#### 黃檗龍

黃檗寺在福州南六十里·山上有龍潭·從崖石間成一穴·直下無底·潭口闊可五尺·寺僧曰·此福德龍也·常時行雨歸·多聞音樂迎導之聲·或於雲霧中隱隱見盤花對引其前者·泉州僧慶老聞而悅之·與輩流數人·至潭畔·焚香默禱·且誦白傘蓋真言·願睹其狀·先取楮鏹投水中·即有物自下引之·倏然而沒·固已駭之矣·時方白晝·黑雲如扇起·頃之滿空·對面不相識·徐徐稍開·一物起潭中·類蓮華而莖柄皆赤色·繼有兩眼如日·輝彩射人·突起其上·諸僧怖懼·急奔走下山·雷霆已隨其後·移時乃止·

#### 慶老詩

慶老·字龜年·能為詩·初見李漢老參政·投贄有共看棲樹鴉之句·大奇之·以為得韋蘇州風味·所居北山下·山頂有橫石如舟·自稱舟峰·漢老更之曰石帆庵·為賦詩曰·鶉作衣裳鐵作肝·老將身事付寒岩·諸天香積猶多供·百鳥山花已罷口■銜·定起水沉和月冷·詩成冰彩敵雲緘·山頭畫舸誰安楫·我欲看公使石帆·又嘗訪之不值·留詩曰·惠遠過溪應送陸·玉川入寺不逢曦·夕陽半嶺鴉棲樹·拄杖尋山步步遲·其後慶老死·漢老作文祭之·曰·今洪覺范·古湯惠休·亦嘗從佛日宗杲參禪·杲不印可·曰·正如水滴石·一點入不得·蓋以言語為之崇雲·泉州報恩寺慶書記·亦能詩·漢老稱賞其一聯雲·人從曉月殘邊去·路入雲山瘦處行·以為可入圖畫·

#### 蔣山蛇